

欽
定
全
唐
文

欽定全唐文卷八百五十一目錄

新文藝出版社藏書

王權

請下諸州依式貢獻奏

請禁貢獻奢侈奏

李象

邂逅致死勿論奏

盧質

桃源獻祖議

呂琦

請疏通注擬奏

梁文矩

請頒示勅令表

請許收河南北人口奏

請詳議任瑤封事奏

進石光贊封事奏

進左墀策奏

四廟諡號廟號陵號議

裴垣

四廟后妃追尊諡議

鄭受益

再論張彥澤疏

崔稅

請貢舉人復詣國子監謁先師奏

請落第舉人得自陳訴奏

朝會樂章制度奏

請立王府師友疏

請獎勵刺史縣令疏

請修史疏

金沙王廟記

裴皞

請刺史經三考許替移奏

張希崇

郭氏義子與親子爭財判

劉光度

澶州建柰河將軍堂記

欽定全唐文卷八百五十一

王權

權字秀山太原人唐末進士歷官右補闕入梁累遷御史中丞後唐莊宗朝授戶兵吏三侍郎尚書左丞禮部尚書清泰中改戶部尚書晉祖入立轉兵部尚書天福中以太子少傅致仕六年卒年七十八贈左僕射

請下諸州依式貢獻奏

每年正仗天下貢物陳於殿庭屬戶部司引進竊以近年以來未甚齊整本二百餘州貢物今止六十餘州伏以任

土勤王本朝故事冀申尊獎所謂駿奔伏乞遍下諸州請依貢式陳進正仗之日所貴整齊

請禁貢獻奢侈奏

臣聞戒奢從儉惟經國之遠圖務實去華乃前王之令範伏惟皇帝陛下開基創業應天順人顯宗樸素之風克協聖明之訓臣伏見諸侯奉貢九土勤王羅紈則織麗奇工器皿則雕鏤異狀文之錦繡雜以珠璣雖外表珍華而事近淫巧臣伏請特降勅旨頒下列藩自今奉貢其鮮麗匹段等酌其物料所值折進生白重絹可將一匹之鮮麗變

數疋之縑繒又進奉銀器及鞍轡等竝不在雕鐫金玉其餘衣甲器械竝不在飾以銀裝布以金彩如有鉤玦瑕處可將銅鐵代之足以換彼鮮明益其堅利雖所減者輕同積羽而所集者重可如山匪惟淳厚國風抑亦豐資天府

李象

象晉天福六年官尚書刑部員外郎

邂逅致死勿論奏

據刑法統類節文云盜賊未見本賊推勘因而致死者有故者以故殺論無故者減一等又云今後或有故者以故

殺論無故者或景跡顯然支證不謬堅持姦惡不招本情
以此致死請減故殺罪三等其或妄被攀引終是平人以
此致死請減故殺罪一等臣按上文云有故殺者以故殺
論此卽是矣其無者亦坐減罪卽恐未當假如官司或有
刑獄未見本情不可全不詰問據言有故者則是曾行拷
捶及違令式或羈枷大棒強相抑壓以此致死者並屬有
故無故者則是推勘之司不曾拷掠又不違法律亦不堅
有抑壓此則並屬無故不可坐刑假若有犯事人舊患疾
病推勘之際卒暴身亡不可亦坐推司減等之罪又據斷

獄律云若依法使杖依數拷決而邂逅致死者勿論邂逅謂不期致死而死且彼言拷決尚許勿論此云無故卻令坐罪事實相背理有未通請今後推勘之時致死者若實無故請依邂逅勿論之義

盧質

質字子徵河南人仕唐爲芮城令天祐三年李克用承制授檢校兵部郎中莊宗之立有翊贊功累擢戶部尚書知制誥充翰林學士承旨同光元年從平梁遷兵部尚書賜論思匡佐功臣天成元年授特進檢校司空同州節度使

明年改賜耀忠匡定保節功臣就加檢校司徒三年入拜
兵部尚書四年進封開國公長興二年授檢校太保河陽
節度使入爲右僕射應順初遷檢校太傅正拜河南尹改
太子少師清泰末復爲右僕射晉祖入立以疾分司洛陽
少帝嗣位拜太子太保天福七年卒年七十六贈太子太
師諡文忠

桃遷獻祖議

臣等以親盡從桃垂於舊典疑事無質素有明文頃莊宗
皇帝再造寰區復隆宗廟追三宗於先遠復四室於本朝

式遇祧遷旋成沿革及莊宗升祔以祖從祧蓋非嗣立之君所以先遷其室光武滅新之後始有追尊之儀只此在於南陽元不歸於太廟引事且疎於故實此時須稟於新規將來升祔先廟次合祧遷獻祖旣叶隨時之義又符變禮之文

呂琦

琦字輝山幽州安次人天祐中後唐莊宗鎮太原以爲代州軍事判官入爲殿中侍御史明宗朝累遷禮部郎中史館修撰清泰三年以端明殿學士遷御史中丞進禮部侍

郎晉祖入立授祕書監遷刑戶兵三部侍郎爵開國子天福八年卒

請疏通注擬奏

臣竊見四時選人三銓待闕停滯已及於數百棲遲列困於累年南曹繫日申選常有三十二十格式每月送闕不過五員七員竊慮闕員漸稀人數轉多拋耕稼於鄉里忍窮餓於街坊名利之途人所難格朝夕之困事亦可矜若不改張恐未通濟欲請勒定月日南曹注納文解只據見在判成待闕選人取殘闕及逐月新闕量人材優劣據員

闕好弱許超折注擬如此卽歲暮至新春已來相次發遣
應盡其將來選人卽依舊至來年十月下解南曹應期判
成銓司准格注擬至次年選畢有正格勅用正規程

梁文矩

文矩字德儀鄆州人梁福王友璋領鄆州辟爲從事入後
唐授天平軍節度掌書記天成中累擢兵部尚書晉祖卽
位改吏部尚書以太子太保致仕天福八年卒年五十九
贈太子太傅

請頒示勅令表

臣近聞有勅命夏秋苗稅取天成二年額爲常定雖聖主時行憂軫而黎民未甚聞知伏請再降明勅令粉壁曉告請許收河南北人口奏

上年平蜀以來軍人將到西川人口甚多骨肉阻隔恐傷和氣請許收認

請詳議任瑤封事奏

臣看詳左拾遺任瑤所進封事切見唐莊宗朝宰臣豆盧革韋說洎歷數朝累行宥典俱遂昭雪頗是分明然則令河令豆盧昇南頓令韋濤因父配流遂停官爵況曾居郎

署久在朝行或已被茜袍或已紆紫綬前後十遷歲厯八奉赦書至於常赦不原亦得乘時被寵況豆盧昇等唐少帝之時刑部已得雪牒便可卻復舊官旋屬僞廷卻除宰子旣塵墨綬須服荷衣敢望明朝特加殊澤竊以任瑤所進封章請復豆盧昇等官序服色望中書商議

進石光贊封事奏

臣伏奉勅牒令參詳文武百官所進封事內宗正卿石光贊上章云伏見滎陽縣道左萬石君廟本前漢大中大夫石奮之廟德行惠績備列前書乞降封崇俾光宗祖者切

以萬石君播盛德於漢朝立嚴祠於鄭圃爰開聖緒永叶
昌期石光贊所上公言備章職分深爲允當望賜施行

進左墀策奏

前汴州陽武縣主簿左墀進策十七條可行者有四其一
請於黃河夾岸防秋水暴漲差上戶充隄長一年一替委
本縣令十日一巡如怯弱處不早處治旋令修補致臨時
淪決有害秋苗旣失王租俱爲墮事隄長刺史縣令勒停
四廟諡號廟號陵號議

奉勅旨定四廟諡號廟號陵號者伏以四代祖朔州使君

府君自天所祐應時而生肇啓靈源始基鴻業謹案諡法
寬容平和曰安臨事屢斷撫俗多方有闕達之能無屈撓
之事豈不謂之寬容平和乎又靖者柔德教衆之義也又
義者行義不失者也請備神主追尊諡曰孝安皇帝廟號
靖祖陵號義陵三代祖右省常侍府君動靜有常夙夜匪
懈憂人若已視民如傷謹案諡法一德不懈曰簡富且不
驕貴而好禮有典有則無怠無荒豈不謂一德不懈乎又
肅者剛德克就之義惠者寬裕不苛者也請備神主追尊
諡曰孝簡皇帝廟號肅祖陵號惠陵皇祖振武僕射府君

淳德不雜素風自高得安邊靜塞之機有阜俗濟民之術
謹案諡法執事有制曰平積善積德允武允文動不爲身
行惟濟物豈不謂執事有制乎又翼者思慮深遠之義又
康者安樂撫民者也請備神主追尊諡曰孝平皇帝廟號
翼祖陵號康陵皇考洛州太傅府君天資睿德神贊沈機
臨戎則有敵必摧撫恤則無民不悅謹案諡法主善行德
曰元盡善盡美乃神乃聖功煥龍圖慶流鳳宸豈不謂主
善行德乎又憲者博聞多能之義昭者明德有功者也請
備神主追尊諡曰孝元皇帝廟號憲祖陵號昭陵

裴垣

垣晉天福初官太常少卿

四廟后妃追尊諡議

奉勅定四廟皇后追尊諡議者伏惟四代祖妣秦氏積行
芝蘭含貞閨壺徽猷令聞厥彰內則之賢懿靜柔明綽有
禮閑之節諒非餘慶何啓昌期謹案諡法宣慈惠和曰元
請追尊諡曰孝安元皇后伏惟三代祖妣安定太君安氏
門稱盛族代謂良家修德行而義冠稽天蘊柔明而風昭
齊體若非淑惠寧協休徵謹案諡法曰貴賢尚義曰恭請

追尊諡曰孝簡恭皇后惟皇祖妣高平縣太君米氏令惠
生知賢才天稟四德早聞於親戚一齊仍著於閨庭淑問
嘗彰貞柔自固謹案諡法嚮惠德義曰獻請追尊諡曰孝
平獻皇后皇妣南陽郡太夫人何氏族惟華貴德乃寬沖
禮諧義聽之文詩協和鳴之詠履大跡而鍾慶祔神龍而
克祥固有靈符來宏景祚謹案諡法溫柔聖善曰懿請追
尊諡曰孝元懿皇后

鄭受益

受益字謙光唐宰相餘慶曾孫累厯臺閣自尚書郎遷右

諫議大夫晉天福間以病告歸尋起拜京兆少尹八年以
賊事賜死

再論張彥澤疏

臣自貢封事已及九日未聞施行實深激憤且臣家在晉
昌備知踪跡彥澤在涇州殺式之後至故雍復害軍將楊
洪一如式之屠割此乃是陛下去歲送張式令彥澤屠戮
致今春楊洪又遭此苦中外觀者痛入骨髓陛下聞之情
詎不傷伏自陛下臨御以來萬方咸歌仁聖一何乖爽大
玷皇猷又彥澤在涇州日擅將甲兵討伐蕃部尋皆陷沒

靡有子遺乃行酷虐之令括爲充墳舊數奪取婦女率掠金帛從順者包羞免禍違阻者飲恨被誅近遠聞王周交代條件上聞凡有濫訛應在其內今陛下畧無所問臣實不平沮王周守法奉公黨彥澤殺人害物臣竊慮此後諸侯効作好事者少繼爲惡事者多蓋陛下喜怒不分賞罰有濫旣無黜陟之法是退賢良之心今外議沸騰皆言陛下廣受彥澤進獻許行非法之事況在郡括馬將及萬蹄到闕獻誠止滿百疋臣痛恨此賊者致陛下招此惡名故也是敢繼犯宸嚴再具論列必乞速行法令免致天下咨

嗟臣又觀陛下前月十八日特降勅命過五日一度內殿起居許臣僚具所見事實封文奏其間勅語曰恐一物失所以百姓爲心可爲憂民疾痛者矣今臣所論奏彥澤蓋爲涇州一方陛下詔墨未乾自違其旨如水投石不動聖心臣竊慮奸邪潛謀罔惑致其明聖有此二三柰何陛下不與執政之臣商量而聽庸愚之輩掩蔽伏以宰臣馮道以下皆忠貞直性輔弼當仁久居調鼎之權上贊垂裳之理而況晨趨玉陛日面龍顏每於造膝之時必竭沃心之奏伏乞宣示前後所貢二狀令對御座子細詳讀若臣所

論彥澤如事謬妄不愜聖旨卽乞便降朝典令天下知彥澤無罪諫臣妄有陳論兼明陛下無朝令夕改之謗臣職忝諫諍理合抗論不避嚴誅希迴英斷

崔稅

稅字子文深州安平人梁貞明三年舉進士甲科後唐明宗朝累遷都官郎中翰林學士晉祖時以戶部侍郎爲學士承旨遷太常卿改太子賓客分司西京卒年六十八

請貢舉人復詣國子監謁先師奏

臣伏見開元五年勅每年貢舉人見訖宜令引就國子監

謁先聖先師學官爲之開講質疑所司設食其監內得舉人亦准此例其日清貧官五品以上并朝集使並往觀禮永爲常式自經多故其禮寢停請舉舊典

請落第舉人得自陳訴奏

臣謬蒙眷渥叨掌文衡實憂庸懦之材不副搜羅之旨敢不揣摩頑鈍絕杜阿私上則顯陛下求賢次則使平人得路但以今年就舉比常歲倍多科目之中寬豪甚衆每駁榜出後則時有宣張不自省循但言屈塞互相朋扇各出言詞或云主司不公或云試官受賂實慮上達聖聰微臣

無以自明晝省夜思臨深履薄今臣欲請令舉人落第之後或不甘心任自投狀披陳卻請所試與疏義對證兼令其日一甲同共較量若獨委試官恐未息詞理倘是實負抑屈則所司固難逭憲章如其妄有陳論則舉人乞痛加懲斷冀此際免虛遭謗議亦將來可遠久施行倘蒙聖造允俞伏乞降勅處分

朝會樂章制度奏

案禮云天子以德爲車以樂爲御大樂與天地同和大禮與天地同節又曰安上治民莫善於禮移風易俗莫善於

樂故樂書議舞云夫樂在耳曰聲在目曰容聲應乎耳可
以聽知容藏於心難以貌覩故聖人假干戚羽旄以表其
容發揚蹈厲以見其意聲容和合大樂備矣又案義鏡問
鼓吹十二案合於何所答云周禮鼓人掌六鼓四金漢朝
乃有黃門鼓吹崔豹古今注云因張騫使西域得摩訶兜
勒一曲李延年增之分爲二十八曲梁置鼓吹清商令二
人唐又有柷鼓金鉦大鼓長鳴歌簫笳笛合爲鼓吹十二
案大享會則設於懸外此乃是設二舞及鼓吹十二案之
由也今議一從令式排列教習文舞郎六十四人分爲八

佾每佾八人左手執籥禮云葦籥伊耆氏之樂也周禮有
籥師掌教國子爾雅曰籥如笛三孔而短大者七孔謂之
笙歷代以來文舞所用凡用籥六十有四右手執翟周禮
所謂羽舞也書云舞干羽於兩階翟山雉也以雉羽分析
連攢而爲之二人執纛前引數於舞人之外舞人冠進賢
冠服黃紗中單皐領襪白練襪襜褕白布大口袴革帶烏皮
履白皮襪武舞卽六十四人分爲八佾左手執干干楯今
之旁牌所以翳身也其色赤中畫獸形故謂之朱干周禮
所謂兵舞取武象用楯六十有四右手執戚斧也上飾以

玉故謂之玉戚二人執旌前引旌似旗而小絳色畫升龍
二人執鼗鼓二人執鐸周禮有四金之奏其三曰金鐸以
通鼓形如大鈴仰而振之金鐸二每鐸二人舉之一人奏
之周禮四金之奏一曰金鐃以和鼓銅鑄爲之其色黑其
形圓若權上天下小高三尺六寸有六分圍二尺四寸上
有伏虎之狀旁有耳獸形銜鐸二人執鐃以次之周禮四
金之奏二曰金鐃以止鼓如鈴無舌搖柄以鳴之二人掌
相在左禮云治亂以相制如小鼓用皮爲表實之以糠撫
之以節樂二人掌雅在右禮云訊疾以雅以木爲之狀如

漆簞而弁口大二尺圍長五尺六寸以殺皮鞞之旁有二紐髹畫賓醉而出以器築地明行不失節武舞人服弁平巾幘金支緋絲大袖緋絲布襦褙甲金飾白練褙褙錦騰蛇起梁帶豹文大口布袴烏皮靴工人二十數於舞人之外武弁朱襦革帶烏皮履白練褙褙白皮襪殿庭仍加鼓吹十二案義鏡云帝設氈案以氈爲牀也今請置大牀十二牀容九人振作歌樂其牀爲熊羆驅豹騰倚之狀以承之象百獸率舞之意分置於建鼓之外各三案每案羽葆鼓一大鼓一金鐃一歌二人簫二人笳二人十二案樂工

百有八人舞郎一百三十有二人取年十五已上弱冠已下容止端正者其歌曲名號樂章詞句中書條奏差官修撰

請立王府師友疏

臣愿觀往代下及近朝既立磐維必擇師友或取其德行彰著或取其學術精通待以優崇俾之規益斯亦前王之急務也伏見陛下頒宣典冊封立親賢盛禮既成普天咸慶諒鴻基之永固豈麟趾以能歌伏願陛下特詔有司遵行舊制慎求端士博訪碩儒命以王官使同遊豫雖聰明

金史卷之二十一
天縱固不俟於切磋而孝敬日躋亦良由於輔導臣謬塵
近侍無補盛時輒以芻蕘上塵旒宸

請獎勵刺史縣令疏

昔漢宣帝續紹皇圖勤恤民隱慎擇循良之吏分居牧守
之權其有政合廉平惠敷疲瘵小則降璽書而勞問大則
錫侯爵以甄酬欲教化之久行故遷移之不遽伏惟陛下
糝糠大漢回復皇唐整百王隳紊之綱削四紀傷夷之弊
永言致治實在審官刺史縣令有能撫綏不必循拘考限
明加獎激就進階資如有課最漸高始終不易量其器業

擢在朝廷自然有位之人咸思職分無爲而治坐致時雍
請修史疏

臣聞高祖神堯皇帝初定天下起居舍人令狐德棻上言
以近代已來多無正史恐十數年後事跡蔑聞因命儒學
大臣分撰南北諸史且言異代猶恐棄遺況在本朝豈以
湮滅臣嘗聞宣宗繼承大業思致時雍旰食宵衣憂勤庶
務十餘年之內可謂治平於時史官雖有注記尋屬多故
輦輅省方未暇刊修皆至淪墜統臨之盛寂寞無聞伏思
年代未遙耳目相接豈無野史散在人間伏乞特命購求

十獲五六亦可備編修冀成一代之信書永祚千年之盛
觀

金沙王廟記

祝嘗泛覽史編徵得大朝故事昔者肇自天寶延及建中
二紀纏兵四郊多壘始之以巨猾乘間繼之以餘孽挺災
猛虎召風長鯨鼓浪翠華避狄去巡濯錦之江博望承桃
遠駐鳴沙之地二京失守四海倒懸苟非命世之偉人孰
拯橫流之大患時則有若尚父汾陽王誠貫天地謀叶鬼
神奮臂一呼投袂而起摧兇黨而稍清趙代總全師而徑

覲靈源國步有依皇威乃震自是東征西伐左披右攘以
戡定爲心期以扶持爲已任不然則安得田承嗣畏威而
屈膝魚朝恩聞義以息心哲后禮之以不名黥虜懷之而
號父者歟若其盛德崇庸嘉謀妙算旣備存於正史固莫
罄於斯文先是洛邑之南有佛寺曰廣化究其經始實我
公之奏置焉厥後遂以貞珉刻成遺狀寘之廊廡多厯歲
時雖越國良金固無銷鑠而殷巖肖像稍闕瞻虔今皇帝
嗣位之三載也日新睿德風布皇猷庶績其凝九功維敘
百蠻款附豈辭重譯而來五稼順成何啻三年之積雖元

首之盡善盡美亦股肱之同德同心惟太師侍中魯國公
手握機衡身爲柱石紀氏有藩屏之慶召公兼方伯之權
杜元凱之立事立言別先懿戚羊叔子之登山臨水不負
勝遊觀是儀形仰其勲德遂首合良輔同率俸金選隱地
於山阿取壤材於澗底別營邃宇以代迴廊操繩墨者曲
盡規模運斤斧者巧呈剗剗高惟轍轍深乃耽耽分雁塢
之煒煌助龍門之秀麗厥構云就遷以處焉望之者凜凜
如生遇之者肅肅加敬不獨旌顯前烈亦將激勸後來非
賢而孰肯慕賢惟善而乃能嘉善豈比夫過隆中之故宅

但想風猷經厭次之荒祠空畱讚頌而已哉旣訖事公命
稅抽毫以志之稅詞非玉海跡忝琳宮矧於不朽之文尤
寡當仁之譽辭之莫獲退而直書清泰三年八月九日記
裴皞

皞字司東河東人光化三年進士厯拾遺補闕梁初遷翰
林學士中書舍人後唐莊宗時擢禮部侍郎改太子賓客
以老拜兵部尚書致仕晉祖時起爲工部尚書復以老拜
右僕射致仕卒年八十五贈太子太保

請刺史經三考許替移奏

欽定全唐文

卷八十五十一

崔稅 裴皞

七

方伯郡守之任與大朝分理疆土共養黎民委寄非輕古今所重親人之職莫過於是伏請啓今後諸州刺史經三考方可替移使能理者盡展所能弊政者自彰其溫優劣旣判黜陟可行則州縣免迎新送故之勞朝廷得惠養除煩之理太平之道無易於斯

張希崇

希崇字德峯幽州薊縣人後唐莊宗朝累遷蕃漢都提舉使天成初契丹命爲平州節度使後逃歸授汝州防禦使遷靈州兩使畱後改邠州節度使晉祖入立除靈武卒年

五十二

郭氏義子與親子爭財判

父在已離母死不至止稱假子孤二十年撫養之恩儻曰
親兒犯三千條悖逆之罪頗爲傷害名教安敢理認田園
其生涯並付親子所訟人與朋姦者委法官以律定刑

劉光度

光度晉天福中鄉貢進士

澶州建柰河將軍堂記

詩云太山巖巖惟魯所瞻標羣嶽之首隱衆靈之府靈者

神也神生於無神之神陰陽不測而爲神日月照輝而爲

明無神之神者至道也道德經云杳杳冥冥於中有精恍

恍忽忽於中有物此之謂也天福六年三月十七日新澶

州岳社頭郭肇專智以金門貢藝玉署呈才風雲

闕二字於

二龍奮躍素高於雙驥副社頭郭肇

闕一字

情涵珠海鑒澈

冰潭貯茂異以盈懷抱才實而鏤志因乘暇豫同慕勝遊

陟彼

闕一字

原共睹橋舸飲酒酣暢而相與言胡不聞賈誼

云生

闕一字

也若浮生死之也若休莊周云生之也道行死

之也物化人

闕一字

短分定豈不在乎神明哉遂乃拱志修

崇歸心祀享結集岳社化被邑人不期月間總四十戶至

天福元年三月十日社衆西自新州東之太

闕一字

遠備牢

醴克置羞薦無愧叨僭惟竭至誠但有遺曠庶幾增建竊

見宮宇炳煥峯巒迴合

空六字

尊神象列侍者星繁唯柰河

闕一字

元非靈廟是以歷覽林藪履蹈河壩東望則天之壇

西臨鬼仙之洞疊嶂重巖倚其後飛雲流水枕其前得此

一方實爲殊勝是以擘畫砂礫

闕四字

任便裁基隨宜勑跡

召公輸於魯甸招匠石於郢郊截咀峽之花松斷新甫之

文柏奇材異石窮神役思以蘊崇碧瓦銅塼盡心畢力以

駢集

闕二字

秉斫爭工不異於雷震劇木飛繩競巧可同於

電捷天福三年五月十日建就堂一所三間四下楹週迴

行牆二十四堵門樓一所悉以粉飾藻繪秀麗精華取金

碧於十洲運丹青於三島香寮綺井返植蓮荷畫棟琬梁

高橫蟠螭翠欄朱網亭亭而日麗九天複道重階落落而

露凝五色天福五年三月九日迎入將軍夫人真形兩座

廝兒妮子兩人夜叉一對郭肇等命以

闕一字

者告厥成功

醺酒焚香虔誠啓仰忻然應變但覺酖顏迴風遶壇實謂

神降此則天意人事聖道合符體乎元元不可窮紀光度

學輸鍾會才謝邱遲堅讓不從輒敢承請是以凝元扣寂

闕一簡字闕一毫力課短懷用旌刊飾銘曰

瞻彼柰河泉流清清噫彼逝人魂飛冥冥善惡斯作禍福
隨情應業受兮靡跡厥靈將軍英靈祠堂窅窅一氣散化

萬神應兆事有克彰物無不照輔贊天孫闕一室岵峭空

字優遊高士放曠清人豫構陰德思振芳塵物景代謝事

蹟相仍成此廟貌永司其津

欽定全唐文卷八百五十二目錄

韓保裔

請狴牢加藥餌奏

殷鵬

請加恩敘封疏

晉故竭誠匡定保乂功臣特進檢校太保右金吾

衛上將軍兼御史大夫上柱國長沙郡開國公

食邑一千八百戶食實封一百戶贈太傅羅公

墓誌銘

并序

王繼恭

致執政書

徐台符

條陳貢舉試義奏

孔昭序

請復北省官常朝不拜疏

李慎儀

乞修飾祠宇疏

孔崇弼

請禁乾沒公廨什物奏

石光贊

請修萬石君廟疏

高鴻漸

請禁喪葬不哀奏

李詳

諫修德省災疏

條奏節度刺史州衙前職員事疏

彈裴譚文

劉知新

請賜尚書省月糧奏

麻麟

請限年除刺史疏

陳保極

請置資福道場疏

欽定全唐文卷八百五十二

韓保裔

保裔晉天福時人

請狴牢加藥餌奏

伏請天下狴牢特頒惻憫抱沉疴者宜加藥餌無骨肉者勿使饑寒庶裨解網之仁用補泣辜之德

殷鵬

鵬字大舉大名人少舉進士後唐閔帝鎮魏州辟爲從事及卽位拜右拾遺歷左補闕考功員外郎充史館修撰遷

刑部郎中晉天福中擢中書舍人卒

請加恩敘封疏

竊聞司封格式内外文武臣僚纔昇朝籍者無父母便與追封追贈父母在卽未叙未封以臣所見誠爲不可此則輕生者而重死者棄今人而錄古人其榮有何其理安在又云父母在品秩及格者卽與封其母不言其父便加邑號兼曰大君遂令妻則旁若無夫子則上若無父豈有父則賤而母則貴夫則卑而妻則尊若謂其父未合加恩安得其母受賜若謂以子便合從貴曷得其父不先伏以父

尊母卑天地之道尊無二上國家同體今母受封父無爵
名教不順莫大於茲臣伏乞自今後文武臣寮父母在其
父已有官爵者卽敘進資品以及格式或不任祿仕卽可
授以致仕或同正官所貴得以敘封妻室卽父母俱榮孝
子無不逮之感閨門交映聖君覃慶賞之恩噫荷陛下孝
治之風受陛下榮親之祿者靜而屈指不過數人陛下得
以特議舉行編爲令式勸天下之爲善令域中之望風自
然見前代之闕文成我朝之盛典況唐明宗朝長興元年
德音內一節應在朝中外臣寮父母在並與加恩司封不

行明制堅執前文倘布新恩兼合舊勅庶使事君事父嘗
遵一體之規爲子爲臣不失兩全之義臣又聞司封令式
內外臣寮官階及五品已上者卽封妻廕子固不分於清
濁但祇言其品秩且諫議大夫給事中中書舍人並是五
品贊善大夫洗馬中允奉御等亦是五品若論朝廷之委
任宰相之擬掄出入之階資中外之瞻望則天壤相懸矣
及其敘封乃爲一貫相沿至此其理甚非而況北省爲陛
下侍從之臣南宮掌陛下彌綸之務憲臺執陛下紀綱之
司首冠羣寮總爲三署當職尤重責望非輕此則清列十

年不遂顯榮之願彼則雜班兩任便承封廕之恩事不均
平理宜改革伏乞自今後應諸司官及五品已上者卽依
舊制施行應三署清望官及六品已上便與封廕清濁旣
異秩品宜昇仍下所司議爲恒式

晉故竭誠匡定保乂功臣特進檢校太保右金吾
衛上將軍兼御史大夫上柱國長沙郡開國公
食邑一千八百戶食實封一百戶贈太傅羅公

墓誌銘

并序

夫天地肅物松柏猶或後彫郊藪呈芳芝蘭焉能長秀故

老氏有必摧之歎仲尼興不實之悲衆木低而梁棟傾嚴霜重而祥瑞去物之有矣可得喻焉公諱周敬字尚素其先顓頊之裔也封於羅以國爲氏地連長沙因家焉公卽長沙之後也曾祖讓皇檢校司空累贈太師封南陽王娶宋氏封越國太夫人祖諱宏信皇天雄軍節度使檢校太師兼中書令長沙王累贈守太師累封趙王諡曰莊肅娶趙國夫人呂氏先薨又娶吳國夫人王氏爲時之瑞命世而生個儻不羣英雄自許有唐之末大盜勃興鎮守一方廓清千里上則忠於社稷下則施及子孫烈考諱紹威皇

天雄軍節度使守太師兼中書令鄴王贈守尚書令諡曰
貞莊天地鍾秀山河孕靈下筆則泉湧其文橫戈則雷震
其武惠惟及物明可照姦曠古已來罕有其比貞莊有子
四人長廷規天雄軍節度副大使檢校太傅駙馬都尉少
薨贈侍中次周翰義成軍節度使檢校太傅駙馬都尉亦
少薨贈侍中次周允前保大軍行軍司馬檢校兵部郎中
兼御史大夫柱國賜紫金魚袋早歷通班繼爲上介綽有
器業可奉箕裘公卽貞莊公第三子也性稟淳和生知禮
樂早失天廕幼奉母儀秦國夫人劉氏卽故兗州節度使

太師公之第三女也肅雍無比柔順有聞示以愛慈加之訓導遂令諸子悉著美名時梁乾化初公之次兄方鎮南燕公時年九歲秦國夫人歸寧於兗州太師之宅遂命侍行至闕下梁闕一字主宣召入內對敷明庭進退有度上甚

器重之遂授檢校尚書禮部員外郎仍賜紫金魚袋自此恒在宮禁出入扈從乘輿與皇親無間侍立冕旒多備顧問無非辯對深洽宸衷上尤奇之其年秋七月歸南燕甲戌秋七月公之次兄薨於滑州之公府上聞訃奏乃謂近臣曰羅氏大勲之後宜賞延遂命公權知滑州軍州事檢

校禮部尚書冬十月上表乞入覲十一月至京師朝謝畢
翌日有制授宣義軍節度使檢校尚書右僕射年方十歲
位冠五侯甘羅佩印之初未爲少達王儉登壇之日已是
老成十二月至自京師乙亥春三月鄴中搆亂河上屯兵
況處要衝屬茲征伐事無巨細公必躬親道路有頌聲軍
民無撓政丙子春二月移鎮許田加檢校尚書左僕射是
歲公年始十二作事可法好謀而成政絕煩苛人臻富壽
忽下徵黃之詔俄諧會尸之期戊寅秋七月朝於京師有
詔尚主公拜表數四辭不獲免遂授檢校司空守殿中監

駙馬都尉壬午冬十月出降普安公主傅粉何郎晨趨月
殿吹簫秦女夜渡星橋一時之盛事難儔千古之清風盡
在癸未春三月除光祿卿冬十月唐莊宗收復梁園中興
唐祚屬當郊祀無失職司遂封開國侯加食邑三百戶至
明宗纂紹之初除右金吾衛大將軍充街使秋九月轉左
金吾衛大將軍充街使執金在彤庭之前佩玉向丹墀之
上仕宦之貴無出於斯上以公久居環衛之班頗著警巡
之效至戊子二月有制授匡國軍節度使加檢校司徒仍
賜耀忠匡定保節功臣下車之後布政惟新福星爰照於

左馮暖律又來於沙苑庚寅夏四月上以圜丘禮畢慶澤
溥行就加檢校太保仍降璽書其年冬十一月朝於京師
除左監門衛上將軍九月轉左領衛上將軍辛卯夏六月
轉左武衛上將軍癸巳五月除左羽林統軍甲午春加特
進階封開國公食邑二百戶改賜竭誠匡定保乂功臣丙
申九月唐廢主以汴師北征命公以所部禁旅巡警夷門
公英斷不回至仁有勇當危疑之際立鎮靜之功浚郊之
民於今受賜今皇帝并門鳳舉洛水龍飛力願推崇首來
入覲上嘉其懿效旌彼殊庸遂除右金吾上將軍美哉出

總藩宣入居嚴衛外則作疲民之藥石內則爲天子之爪
牙文武兩班踐揚將遍物禁太盛古之有言壽年未高染
疾不起以天福二年七月二十七日薨於汴州道德坊之
私第享年三十有三嗚呼皇天莫問徒云輔德之言大夜
何長共有殲良之歎上聞所奏惻怛哀慟輟視朝兩日厚
加賙幣贈太傅君臣之義終始克全公以己丑歲五月梁
普安公主薨於同州後再娶東海郡徐氏夫人卽故東川
節度使太師第五女也蕙質蘭姿懿德令範孰念孤鸞之
歎自傷黃鵠之歌公有姪延

闕一字

見任開廐副使卽魏博

闕一大將軍侍中之子也樸玉其儀渾金其器度評闕二字

相貌闕五人字公亦三子四女長子延賞守太子舍人

次延緒次延宗皆稟庭訓悉紹家聲龍駒鳳雛得非天性

良金瑞玉自是國楨終天懷風樹之悲蹈地有蓼莪之痛

長女適郝氏次適婁氏二女方幼諸子皆普安公主之出

也公主靜惟閑雅動有規儀休聲首冠於皇闕一字淑德克

彰於婦道帝王之女無以過焉公性不好弄幼善屬文嚴

毅而至和溫恭而難犯言惟合道動不違仁張充一變之

年已功成名遂闕四字之日乃善始令終以丁酉歲冬十月

六日安葬於洛陽縣之原禮也孤子延賞等泣告鵬曰公之履行爲衆所知公之勲庸歷代罕比若非故舊孰能縷陳鵬列親表之間受顧念尤最難避狂簡輒勒貞珉序不盡言乃爲銘曰

積慶之門挺生奇傑入覲堯庭出持漢節十乘啓行萬夫觀政宵旰無憂袴襦入詠英華發外清明在躬惟忠惟孝立事立功滑臺去思璧田來暮藹然休光綽有餘裕摛繡文翰傳粉容儀承顏紫禁飛步丹墀門盛七葉祿逾萬石外冠時英內光帝戚歷事累朝薦逢多難動有成功舉無

遺算秋敗芳蘭地埋良玉山雲晚愁林風夜哭土孫一去
今不復還陵園草色兮秋黃春綠

王繼恭

繼恭晉天福中威武軍節度福建管内觀察處置等使加
特進檢校太傅封臨海郡王

致執政書

閩國一從興建久歷年華見北辰之星位頻移致東海之
風帆多阻願言遐想文不逮誠餘遣郎吏林恩列狀申述

徐台符

金匱要略卷之二十三
台符晉天福中以監察御史爲尚書膳部員外郎知制誥
條陳貢舉試義奏

貢舉之司條貫之道有沿有革或否或臧蓋趨向之不同
致施行之有異今欲酌其近例按彼舊規參而用之從其
可者謹條如右九經元格帖經一百二十帖對墨義汎義
口義共六十道策五道去年知舉趙上交起請罷帖書汎
義口義都對墨義一百五十道合今請去汎義口義都對
墨義六十道其帖書對策依元格五經元格帖書八十帖
對墨義五十道臣今請對墨義十五道其帖書對策依元

格明法元格帖律令一十帖對律令墨義二十道策試十條去年罷帖對墨義六十道策試如舊臣今請並依元格學究元格念書對墨義各二十道策五道去年罷念書都對墨義五十道今請依去年起請三禮元格對墨義九十道去年添四十道臣今請並依元格三傳元格對墨義一百一十道去年對四十道臣今請並依元格開元禮三史元格各對墨義三百道策五道去年加對五十道臣今請並依元格進士試雜文詩賦帖經二十帖對墨義五道去年依帖經對義別試雜文二首臣今請依起請別試雜文

其帖書對義請依元格童子元格念書二十四道起請添
念書都五十道及三十通者故臣請依起請

孔昭序

昭序晉天福中官太子賓客累遷工部尚書

請復北省官常朝不拜疏

伏見本朝儀制北省官爲近侍之班遂異常參之禮所以
百寮則曰拜蓋云謝食北省官不赴廊飧食於本署故常
朝不拜況今耆舊皆目睹躬行伏望陛下順考古道率由
舊章正立朝之常規遵先王之定制

李慎儀

慎儀晉天福中爲翰林學士考功員外郎轉都官郎中改中書舍人

乞修飾祠宇疏

今春已來稍愆雨澤陛下念稼穡之重深宵旰之憂倍軫聖心遍走羣望盈尺則告瑞於元朔如膏則潤浹於暮春可卜豐穰動諧響應請天下凡祠宇有益於人者下本處常令修飾冀集洪休

孔崇弼

崇弼唐宰相緯子仕後唐自吏部郎中授給事中晉天福中遷左散騎常侍

請禁乾沒公廨什物奏

天下州縣長吏每到任造得公廨什物罷任之時多事已有不係案牘此後請公廨什物明立文案不許乾沒免致擾人

石光贊

光贊晉天福中官宗正卿

請修萬石君廟疏

昔周武王奄有天下過商容之間必式見比干之墓卽封
蓋褒賞賢良尊崇忠義伏惟皇帝陛下顯膺天命開創鴻
圖解網行仁救時順動樂業不知於帝力悅隨但聽於山
呼盛德難名太平可待臣伏見滎陽道左有萬石君廟本
前漢大中大夫石奮之廟奮有子四人各二千石祿景帝
曰人臣尊寵畢集其門故號萬石君德行懿績備列前書
唐大中十三年鄭州司馬石貫稱裔孫刊石廟廷備紀其
事伏遇皇帝行幸浚郊經過滎水展義已聞於岐路覃恩
宜布於幽明其萬石君廟伏乞俯宏霈澤特降封崇俾光

遠祖之徽猷益茂我朝之盛典

高鴻漸

鴻漸晉天福中官將作少監

請禁喪葬不哀奏

伏覩近年已來士庶之家死喪之苦當殯葬之日被諸色
音樂伎藝人等作樂求覓錢物伏乞顯降勅文特行止絕
或所在官吏等通容不與覺察請行朝典

李詳

詳晉天福中官中書舍人

諫修德省災疏

臣聞天地之道以易簡示人鬼神之情以禍福爲務王者祥瑞至而不喜災異見而輒驚罔不寅畏上元思答譴告臣聞北京地震日數稍多臣曾覽國書伏見高宗時晉州地震上謂羣臣曰朕政教不明使晉州屢有震動耶侍中張行成對曰天陽也地陰也陽君象陰臣象君宜動轉臣宜安靜今晉州地震彌旬不休將恐女謁使事臣下陰謀且晉州陛下本封今地震焉尤彰其應伏願深思遠慮以杜未萌又開元中秦州地震尋差官宣慰又降使致祭山

川所損之家委隨事制宜奏聞伏惟陛下中興唐祚起自
晉陽地數震於帝鄉理合思於天誠臣伏思陛下統臨萬
國於今六年猛將如雲銳師如雨出無不捷叛無不擒歲
稔時豐人安物阜實慮天意恐陛下忘創業艱難之時有
成功矜滿之意欲陛下有始有卒於兢兢業業也今伏望
聖慈特委親信兼選勲賢且往北京慰安密令巡察問疾
苦於黎庶俾議蠲除備祭祀於山川各加虔禱然後乞陛
下鑒前朝得喪之本採歷代聖哲之規近君子而遠小人
任賢無貳杜邇言而求讜議擇善而從崇不諱之風罷不

急之務則景公修德熒惑退舍以爲祥太戊小心桑穀生
朝而不害自然妖不勝德所謂宏之在人寰瀛永定於無
疆遐邇長歸於有道

條奏節度刺史州衙前職員事疏

臣聞除舊布新故順天而設教惟名與器不假人以樹恩
所以示寓縣之至公所以仰朝廷之大柄今則旣逢英主
未革前蹤是敢聊舉一端輕塵四達酌其損益幸補涓埃
伏覩南北兩班內庭諸局或有不文不武非舊非勲論技
術則罔有所長語才行則罕聞其異但思月限以冒官常

俾五細以在庭使四方而何則有虛華級仍蔭私門忝榮
更及於子孫祿利徒銷於府庫況今方興戎事久困生民
因無用之官寮具員無闕計有限之財力帑藏正虛若不
去畱空成耗蠹伏望畧加澄汰稍辨幽明則支分或減於
殷憂內外庶成於通濟又覩十年已來肆赦頻降諸道職
掌一例獎酬藩方不守於規程奏薦罔論其高下僕隸則
動逾數百絲綸則皆示特恩所以倉場管鑰之微人曹局
簡札之小吏至於伶倫賤類洒掃庸奴初命便假於貴階
銀章青綬拜賜遽披於法服牙笏紫袍乃致貴賤不分寵

榮濫被雖雷雨作解渥澤恐遺於萬物而衣裳在笥貞規
何法於百王此後或有溥恩應諸道職員除主兵將校外
其衙前職列伏乞明示條章俾循事體節度州只許奏都
押衙都虞候教練使客將孔目官及有朱記大將十人仍
取上名支郡則只許薦都押衙都虞候孔目官其諸色人
並委本道量轉職次則得之者感恩有異受之者與衆稍
殊寰區仰天子之尊藩后知王澤之貴名器之重治亂是
資伏惟皇帝陛下俯迴宸覽畧照愚衷勿謂小善不行勿
謂舊弊難改失之在漸謀之在初倘或因此畱神自可觸

類而長

彈裴譚文

異李朝隱一判破桓敬等五家附會三思狀驗斯在天下聞者莫不寒心刑部尚書從此而得

劉知新

知新晉天福中官考功郎中嘗使契丹

請賜尚書省月糧奏

尚書省京師會府輦轂繁司奏議雖委於官寮行遣亦資於胥史六典之制官吏有俸有糧其尚書省諸司令吏伏

請給賜月糧俾其奉職

麻麟

麟晉天福中官刑部員外郎

請限年除刺史疏

臣聞漢朝除吏苟稱其職不數遷移自先朝開國已來牧
守多酬勲舊以寵勞臣竊見晉朝除刺史或數月驟替或
一歲卽移不惟送故迎新轉成煩擾其次廉能者未暇施
政貪濁者轉急誅求以臣愚管望朝廷立定年限觀其考
課以議轉遷

陳保極

保極閩人後唐天成中進士累遷禮部倉部員外郎晉天福中桑維翰居相位奏貶衛尉寺丞尋復爲倉部員外郎卒

請置資福道場疏

元冬告謝密雪未零竊慮今夏龍德啓圖鑾旌赴闕擁十萬衆臨九重城讐怖龍神震驚方位致瘥札爲沴風雨失時請在京諸寺觀置迎年消災資福安土地龍神道場